

04 AUG 1999

Mahathir-Mapen

BANGUNKAN USAHAWAN MALAYSIA BERKELAS DUNIA, KATA MAHATHIR

KUALA LUMPUR, 4 Ogos (Bernama) -- Perdana Menteri Datuk Seri Dr Mahathir Mohamad berkata Malaysia perlu membangunkan usahawan berkelas dunia dengan usahawan daripada semua kaum saling sokong menyokong untuk berjaya dalam dunia global.

"Kalau duhulunya strategi DEB (Dasar Ekonomi Baru) dan DPN (Dasar Pembangunan Nasional) tertumpu kepada mewujudkan usahawan tempatan Bumiputera, sekarang kita perlu memikirkan bagaimana mewujudkan usahawan Malaysia termasuk Bumiputera yang berkelas dunia," katanya.

Ketika berucap melancarkan Majlis Perundingan Ekonomi Negara Kedua (MAPEN II) di Pusat Dagangan Dunia Putra (PWTC) di sini hari ini, Dr Mahathir berkata kegawatan ekonomi yang dialami negara bukan sahaja menjejaskan usahawan Bumiputera malah juga usahawan bukan Bumiputera.

MAPEN II, yang dipengerusikan oleh bekas Ketua Setiausaha Negara Tan Sri Ahmad Sarji Abdul Hamid, diberi masa sehingga September tahun hadapan untuk mengemukakan laporannya kepada Jemaah Menteri.

MAPEN II, ditubuhkan oleh kerajaan untuk menjadi satu badan penting dalam proses penggubalan dasar utama bagi pembangunan negara dalam dekad pertama alaf baru. Para anggotanya terdiri daripada wakil pelbagai kumpulan dan kepentingan untuk menentukan bahawa pandangan yang dikemukakan mewakili pendapat semua lapisan masyarakat Malaysia.

Dr Mahathir berkata, kegawatan ekonomi telah menunjukkan bahawa usahawan bukan Bumiputera juga "rapuh" dan perlu diperkukuhkan.

"Usahawan Bumiputera dan bukan Bumiputera perlu berganding bahu dan bekerjasama demi memantapkan keupayaan menghadapi cabaran global.

"Jika kita bersatu, kita akan mampu mewujudkan usahawan Malaysia yang teguh, mampu bersaing dan tahan uji," katanya.

Perdana Menteri juga mahukan Malaysia meningkatkan lagi daya saing dalam era liberalisasi dengan meningkatkan bahagian pasaran yang diperolehi oleh negara.

Usaha itu memerlukan produk yang kompetitif dan peningkatan produktiviti negara melalui pembangunan tenaga manusia daripada segi kecekapan.

"Kita perlu menguasai sepenuhnya kecekapan dalam membuat pembaharuan dan inovasi kita sendiri," katanya.

Dr Mahathir meminta pengusaha dan pengguna di negara ini mengubah sikap untuk menerima produk ciptaan rakyat Malaysia bagi memajukan bidang penyelidikan dan pembangunan (R&D).

Bidang R&D tidak menarik minat dan kurang berhasil di negara ini kerana secara umumnya pengusaha dan pengguna tidak sanggup menerima pendekatan dan barangan ciptaan rakyat negara sendiri, katanya.

Perdana Menteri juga mahu MAPEN II mengenal pasti dan menerokai bidang-bidang baru yang boleh menyumbang kepada pertumbuhan ekonomi bagi menangani kegawatan ekonomi.

"Teknologi maklumat umpamanya boleh digunakan untuk pembangunan industri baru yang berasaskan kepadanya. Koridor Raya Multimedia mempunyai potensi yang besar dan latihan dalam bidang ini perlu dipergiatkan," katanya.

Dr Mahathir berkata industri berasaskan kepada bahan komposit yang semakin banyak digunakan untuk automobil dan pesawat terbang boleh memberi sumbangan kepada industri pembuatan.

Perdana Menteri turut menyarankan agar pendekatan baru diperkenalkan

bagi memajukan bidang pertanian seperti pengurusan estet secara besar-besaran untuk mengeluarkan sayur-sayuran dan buah-buahan selain cara baru menangkap dan menternak ikan.

Langkah itu akan meningkatkan pendapatan petani dan nelayan sementara negara pula dapat mengelak pengaliran keluar tukaran asing melalui import makanan.

"Jika kita memasuki bidang pertanian secara besar-besaran dengan mengadakan estet, kita pasti boleh memajukan lagi industri pertanian bukan sahaja untuk mengurangkan import makanan tetapi juga mengeksport lebih daripada keluaran yang diperlukan dalam negara," katanya.

Pekebun kecil tidak akan rugi jika estet sayur-sayuran dan buah-buahan diadakan kerana seperti juga dengan kelapa sawit, estet boleh membeli produk pekebun kecil untuk digred, diproses dan dipasarkan serta boleh dipasarkan semasa musim dan luar musim, katanya.

Nelayan baru pula hendaklah terdiri daripada mereka yang terlatih dan sanggup mengguna peralatan cara baru yang boleh meningkatkan pengeluaran ikan segar serta menambah pendapatan nelayan baru dan lama.

Dr Mahathir berkata, bidang pertanian sebelum ini kurang mendapat perhatian semasa negara menumpukan kepada pembangunan industri pembuatan dan ia lebih bertumpu kepada pembangunan estet getah, kelapa sawit dan koko.

"Kita tahu bahawa import makanan negara adalah item terbesar yang menyebabkan pengaliran keluar tukaran asing. Sebaliknya pendapatan daripada pengeluaran keluaran sayur-sayuran, buah-buahan dan bunga-bunga jauh lebih tinggi daripada pendapatan daripada getah atau kelapa sawit atau koko," katanya.

Mengenai matlamat menjadikan Malaysia tumpuan serantau dalam pelbagai bidang seperti pengangkutan udara dan laut, pelajaran, kesihatan dan pelancongan, Dr Mahathir berharap anggota MAPEN II dapat menajamkan strategi sedia ada agar pusat serantau yang mahu dibentuk itu bermutu tinggi atau "world class".

Beliau juga mahu MAPEN II juga melihat soal moral dan kerohanian dalam usaha membangunkan ekonomi negara ke arah status negara maju.

-- BERNAMA

AFY MAI